

Kalaallit Nunaanni sullivinni avatangiisit pillugit inatsisip allanngortinneqarnissaa pillugu inatsimmut oqaaseqaatissaq pillugu Inatsisartut aalajangiiffigisassaattut siunnersuut.

(Inuussutissarsiornermut Aatsitassanullu Naalakkersuisoq)

pillugu

Inuussutissarsionermut Ataatsimiititaliap

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Inuussutissarsiornermut Ataatsimiititaliap kingullermik suliarinninnermini makkunangga inuttaqarpoq:

Inatsisartunut ilaasortaq Naaja Nathanielsen, Inuit Ataqatigiit, siulittaasoq

Inatsisartunut ilaasortaq Andreas Uldum, Demokratit, siulittaasup tullia

Inatsisartunut ilaasortaq Kim Kielsen, Siumut

Inatsisartunut ilaasortaq Akitsinguaq Olsen, Siumut

Inatsisartunut ilaasortaq Knud Fleischer, Kattusseqatigiit Partiiat

Inatsisartunut ilaasortaq Aqqaluaq B. Egede, Inuit Ataqatigiit

Inatsisartunut ilaasortaq Jens Immanuelson, sinniisussaq, Siumut

Siunnersuutip UPA/2012-imi siullermeerneqarluni suliarineqarnerata kingorna ataatsimiititaliap siunnersuut misissorpaa matumuunalu Inatsisartuni suliarineqarnissaanut isummersuutini saqqummiullugit.

1. Siunnersuutip imarisaa siunertaalu

Inatsisissatut siunnersuut pingaarnertut makkuninnga qulequtaqarpoq:

a) Qallunaat Nunaanni sullivinni avatangiisit pillugit inatsimmi malittarisassat assigisa Kalaallit Nunaanni sullivinni avatangiisit pillugit inatsimmi atuutilersinneqarnissaat siunnersuummi matumani siunertaavoq, tassalu sulisitsisup inatsimmi isumannaallisaanikkut

peqqissutsikkullu malittarisassat sutigut tamatigut eqqortissimappagit, sulisitsisup pinerluttulerinermi inatsisitigut akisussaaffiik killiliinissaq.

b) Peqatigisaanillu siunnersuutigineqarpoq sulinermi avatangiisit pillugit inatsimmik sakkortuumik imaluunniit mianersuaalliornikkut unioqqutitsinermi, sulisut pinerluttulerinermi inatsisitigut akisussaaffiisa sakkortusinissaat.

c) Taamatuttaaq siunnersuutigineqarpoq, sulinermi avatangiisit pillugit inatsimmi malittarisassat pisuni perlasinermi, inuup ajoquserujussuarneranik imaluunniit toquneranik kinguneqartumik, pinerluttulerinermi inatsisitigut pineqaatissiisarnerup qallunaat inatsissaattulli sukateriffigineqarnissaat.

d) Aammattaaq siunnersuutigineqarpoq, sanaartorerup iluani ataqatigiissaarisutut sulisinermi avatangiisinut tunngasumik immikkut ilinniartitaanerup Danmarkimisulli atuutilersinneqarnissaa.

e) Tamatuma saniatigut sulinermi avatangiisit pillugit Kalaallit Nunaanni ilinniartitsinermit Sullivinnik Nakkutilliisoqarfiup aningaasartuutaata ilaanut matussutissanik akiliuteqartitsisarnissamut inatsisitigut erseqqissumik tunngavissiisoqarnissaa siunnersuutigineqarpoq.

f) Kiisalu sinerissap avataani sullissinermit tunngasuni suliassaqarfiup Namminersorlutik Oqartussanit tiguneqareernerata malitsigisaanik Kalaallit Nunaanni sulinermi avatangiisit pillugit inatsimmi allannguinnissaq siunnersuutigineqarpoq. Tassami aatsitassat pillugit inatsisikkut 2009-imeersukkut sulinermi avatangiisit kalaallit nunaata imartaani nunaviullu toqqarviani sinerissap avataani sullissinermit tunngasut malittarisassiuunneqarmata.

2. Siunnersuutip Inatsisartuni siullermeerneqarnera

Siunnersuut siullermeerneqarmat partiit akornanni siammasissumik siunnersuut tapersersorneqartoq inuussutissarsiornermut ataatsimiititaliap maluginiarpa.

3. Tusarniaaneq

Inatsisissatut siunnersuut oqartussaasunut kattuffinnullu il. il. makkuusunut tusarniutigineqarpoq: Namminersorlutik Oqatussat, Kalaallit Nunaanni Sullivinni Avatangiisit pillugit Siunnersuisoqatigiit, Kalaallit Nunaata Sinniisoqarfia kiisalu Kalaallit Nunaanni Politimesterimut. Tassunga ataatsimiititaliaq oqaaseqaatissaqanngilaq.

4. Ataatsimiititaliap siunnersuummik suliarinninnera

Suliffeqarnermi avatangiisinut tunngatillugu malittarisassanik atuutsinneqartunik nutarterisoqarnissaata suliniutigineqarnera, ataatsimiititaliap pitsaasutut isigaa. Sullivinni avatangiisit pillugit inatsisip ilaanik unioqqutitsinermi sulisitsisup pinerluttulerinermi inatsisitigut akisussaaffiisa sakkukillisinnaasaat ataatsimiititaliap naleqquttutut isigai, sulisitsisup inatsimmi isumannaallisaanikkut malittarisassat sutigut tamatigut eqqortissimappagit. Ataatsimiititaliap maluginiarpaav sulinermi avatangiisit pillugit malittarisassanik atuutsinneqartunik sakkortuumik imaluunniit mianersuaalliornikkut unioqqutitsinermi, sulisut pinerluttulerinermi inatsisitigut akisussaaffiisa sakkortusinissaannik siunnersuut aammattaq imaqartoq.

Ataatsimiititaliap paasivaa inatsisip atuuttup kingunerisinnaagaa sulisup sullivinni avatangiisit pillugit inatsimmik unioqqutitsinerata malitsigisaanik sulisitsisoq pineqaatissineqarsinnaasoq. Tamanna sulisitsisup sullivinni avatangiisit pillugit inatsimmi pisussaaffiit tamaasa naammassisimagaluarpagilluunniit. Perlasinermi inuup ajoquserujussuarneranik kinguneqartumik sullivinni avatangiisit pillugit inatsimmik sulisut unioqqutitsineranni sulisitsisumik pineqaatissiisinnaaneq ataatsimiititaliap pissusissamisuunngitsutut isigaa. Periarfissaq tamanna tulluutinngitsutut isikkoqarpoq, taamaattumillu inatsisikkut tamatuma iluarsiviginiarneqarnera ataatsimiititaliap isumaqataaffigaa.

Aammattaq tassunga atatillugu siunnersuutigineqarpoq unioqqutitsinerne tamanna perlasinerne kinguneqarsimatillugu, inuup ajoquserujussuarneranik imaluunniit toquneranik kinguneqartumik tassuunakkut pineqaatissiisarnerit sakkortusineqassasut. Isumaqaq tamanna ataatsimiititaliap isumaqataaffigaa, naleqquttutullu isigalugu pisuni sulisup suliffimmini ajutoorluni toquneranut imaluunniit ajoquserujussuarneranut inatsisip immikkoortuata sakkortusineqarnissaa.

Tamatumunnga atatillugu ataatsimiititaliaq isumaqarpoq inatsisip allannguutaata akuerineqarnissaa pingaaruteqartoq taamaalluni ersersinneqassamat, kalaallinit inuiannit kissaatigineqartoq ajutoorsinnaanerit navianaatillit sapinngisamik minnerpaaffissaaniitikkumaneqartut, taamaammallu sullivinni avatangiisit pillugit inatsimmik unioqqutitsisoqarnerani tamanna toqumik kinguneqartillugu akisussaasumut tamatumuuna sakkortuumik kinguneqartitsisoqartariaqartoq.

5. Siunnersuutip aningaasatigut allaffissornikkullu kingunerisinnaasai

Ataatsimiititaliap paasivaa siunnersuut kalaallinut inuussutissarsiortunut aningaasartuuteqarnerulernermik kinguneqassanngitsoq Sullivinni Nakkutilliisut sullivinni avatangiisit pillugit ilinniartitsinermut akileeqaataassutigisartagaat siunnersuutikkut matumuuna qaffaateqarnaviannimmata.

Sullivinni avatangiisit pillugit ilinniartitsinernut Sullivinni Nakkutilliisut sulisitsisumut akiliuteqartitsisalernissaannik inatsisitigut tunngavigisassap ersarissarneqarnissaanik siunnersuuteqarneq, periuserineqartumut atuutsinneqartumut aaqqiissutaannaassaaq. Sullivinni avatangiisit pillugit suliani pinerluttulerinermi inatsisitigut iliuusissanut allannguutissatut siunnersuutigineqartut, politiinut unnerluussisussaataasunullu killilimmik aningaasartuuteqarnerunissamik nassataqarsinnaanerat ilimagineqarsinnaavoq. Inatsisissatut siunnersuut Namminersorlutik Oqartussanut aningaasartuuteqarnerunissamik kinguneqassanngitsutut ataatsimiititaliamit isigineqarpoq.

6. Ataatsimiititaliap inassuteqaataa.

Siunnersuutip akuerineqarnissaa **ataatsimiititaliap isumaqatigiittup** inassutigaa.


Taamatut oqaaseqarluni isumaliutissiisummilu paasinninni naapertorlugu ataatsimiititaliap siunnersuut aappassaaniingassanngortippaa.




Naaja Nathanielsen,
Siulittaasoq



Kim Kielsen




Aqqaluaq B. Egede



Andreas Uldum



Knud Fleischer



Jens Immanuelson



Akitsinguaq Olsen